

Giubileum cun edizium speciala

Avon diesch onns eil il Forum cultural Tujetsch vegnius fundaus

DA HANS HUONDER / ANR

La fin da november commemorescha il Forum cultural Tujetsch il giubileum da diesch onns. Cun quella caschun presenta el ina nova edizium cun ovas da pader Baseli Berther. Il medem mument sa il forum mirar anavos sin ina vasta ed engaschada activitad duront ils emprems diesch onns da sia existenza. El ha sviluppau ed exequiu differents projects sil sectur dalla cultura e dalla historia locala. Il matg 1997 ei il Forum cultural Tujetsch vegnius fundaus sin iniziativa da *Bruno Berther*, *Tarcisi Hendry* ed *André Schmid*. La finamira dall'organisaziun nova ei stada quella da promover tuttas spartas e stentas culturalas enteifer la vischnaunca. Ultra da quei han ils iniziants avisau ina megliera sensibilisaziun dalla populaziun pils fatgs culturals. Ils 30 da november 2007 tila il forum ina bilanza dall'activitad dils emprems diesch onns. Il medem mument duei vegnir fatg ponderaziuns pigl avegnir. Sin quella moda ha la suprastonza orientau il venderdis vargau ils 14 presents alla radunonza generala. Cun occasiun da quella ei Bruno Berther seretratgs dalla suprastonza. Per el ei *Nicolina Cathomen-Giossi* vegnida tscharnida. Tarcisi Hendry ed Andre Schmid ein vegni confirmai en lur funcziuns en suprastonza.

Project desiderau

Dapi entgins onns ein ils responsabels dil forum vid las preparativas per fedizium dallas ovas da pader Baseli Berther che ha viviu da 1858 entochen 1931. Sco quei ch'il president dil forum, Andre Schmid, constatescha, ei Baseli Berther staus il historiograf dalla Val Tujetsch: «Cun sias lavurs ha el sensibilisau la populaziun indigena per la cultura e la historia ed aschia intimau biars da scriver sur dalla vischnaunca.» Sut l'egida da Tarcisi Hendry han differentas persunas luvrau ils davos onns intensivamein vid l'ovra desiderada. Cun occasiun dil giubileum da diesch onns dil forum, ils 30 da november 2007, vegn igl emprem tom finalmein presentaus. El rom dall'entira projectaziun ha surtut la finanziaziun dall'ovra caschunau bein enqual fastedi al forum. «Igl ei buca stau sempel da recaltgar ils daners per quei project. Grazia al generus sustegn dalla vischnaunca e da differentas instituziuns eis ei tonaton reussiu.» Igl ei previu d'edir in secund ed eventualmein era in tierz tom dallas ovas da Baseli Berther. Quellas sefatschentan oravontut dalla vischnaunca e la claustra da Mustér sco era d'ulteriuras vischnauncas vischinontas. Il medem mument sco la, presentaziun dall'ovra nova duei era la biblioteca privata da *Vic Hendry* vegnir presentada alla publicitad. Quella ha il scribent regalau alla vischnaunca ensemen cun sia collecziun da requisits dil luvratori dad uler da Bugnei. Fertion che ses cudischs vegnan exponi el niev dentertract dalla casa da scola ein ils requisits da contemplar el museum local La Truaisch a Sedrun.

Novas dalla historia locala

Il mument ei il Forum cultural Tujetsch era lundervi da sefatschentar dad in'ovra da pader Placi a Spescha. Quel ha pastorau a Selva e Sedrun. En quei temps ha el era descret la Val Tujetsch. Tenor Andre Schmid datescha quei manuscret digl onn 1805. Igl onn 1913 - 80 onns suenter sia mort - ei vegniu ediu ina part da ses numerus manuscrets. Il mument marschan las preparativas per in'edizium nova. Igl ei previu da publicar ella en dus onns: En lavur ei medemamein la sanaziun e restauraziun dil casti da Putnengia a Dieni. Essend ch'ins ha cattau novs mirs avon dus onns ein las lavurs seretardas e han stuiu vegnir interruttas uonn. Tenor Andre Schmid ha il cantun pretendiu in niev project. Sin fundament da quellas circumstanziass san las lavurs vegnir cuntinuadas l'auter onn. Lu duein ellas era vegnir terminadas. Da migliurar resta lu sulettamejn aunc il contuorn. La finanziaziun ei per gronda part gia garantida.

Danovamein ha il forum organisau la stad vargada la notg da film a Sedrun. Quella ha giu bien success, aschia ch'ina cuntinuaziun ei probabla. Cun occasiun dalla sera da film da l'auter onn eis ei previu da presentar ina producziun davart las lavurs da construcziun dil conduct d'aula tensiun ella Val Mila.